

八、如属校勘注释本，底本中部分冷僻典故、典章制度、职官别称、佛道术语、人名、地名等，均就校注者之学力与手头可据资料加以简释，以便阅读。考虑到旧志读者已具相当学力，并为慎重起见，多校少注。

## 目 录

### 卷 首

序 .....	黄许桂
原序 .....	(3)
原跋 .....	(10)
重修平和县志序 .....	(14)
修志姓氏 .....	(15)
凡例 .....	(16)
目录 .....	(17)
图考 .....	(19)

### 卷 一

沿革 .....	(25)
疆域 .....	(34)
山川 .....	(46)

### 卷 二

户口 .....	(61)
田赋 .....	(68)
关隘 .....	(89)
水利 .....	(94)
城池 .....	(96)
津梁 .....	(98)
古迹(附坊表) .....	(100)
公署 .....	(103)

## 卷 三

- 学校····· (106)  
 祀典····· (113)  
 祠庙····· (132)  
 兵制····· (142)  
 武功····· (150)

## 卷 四

- 屯田····· (159)  
 铺递····· (162)  
 盐法····· (164)  
 职官····· (166)

## 卷 五

- 选举····· (210)  
 封荫····· (252)  
 政绩····· (285)

## 卷 六

- 艺文····· (293)  
 疏表····· (293)  
 传序····· (298)  
 碑记····· (314)  
 墓表····· (337)  
 碑铭····· (339)  
 诗赋····· (351)

## 卷 七

- 人物····· (377)  
 名臣(附忠节)····· (377)  
 宦绩····· (386)  
 理学····· (395)

- 孝友····· (395)  
 义行····· (401)  
 儒林····· (405)  
 文苑····· (406)  
 隐逸····· (407)  
 方技····· (408)  
 流寓(附)····· (408)  
 仙释(附)····· (410)

## 卷 八

- 列女····· (413)  
 节孝 节烈 贞女 烈女····· (413)  
 名媛(附)····· (444)

## 卷 九

- 冢墓····· (445)  
 寺观····· (447)  
 典籍····· (451)

## 卷 十

- 风俗····· (453)  
 士习····· (453)  
 民风····· (453)  
 农事····· (458)  
 女工····· (458)  
 工役····· (458)  
 商贾····· (458)  
 饮食····· (460)  
 衣服····· (460)  
 歌谣····· (460)  
 墟集····· (461)

乡饮(附).....	(465)
<b>卷 十一</b>	
物产.....	(467)
祥异.....	(492)
杂识.....	(500)
<b>附 录</b>	
金 镛:国朝拟修平和县志序 .....	(506)
王 相:重修平和县志序 .....	(506)
杨卓廉:序 .....	(508)
王守仁:再议平和县治疏 .....	(509)
<b>后 记</b> .....	(512)

## 平和县志卷首

### 序

署知县事 黄许桂

平和自明正德初建县至今三百一十六年。志凡三修，惟国朝王前县相康熙五十八年所修一志今可得见，其嘉靖、崇祯时谢公明德、朱公统旣两志迄无存者。

癸巳春，余来署邑篆，会列宪有修《福建通志》之举，已历五年，而平和志书尚未有起而修之。因思一事采访不到，即无以成一县之志；一县志书不到，即无以成通省之志。今各县多告厥成功，而和又乌可缓哉？于是延邑缙绅文学之士，采辑会纂，金谓九和书院山长曾漱斋博古通今，以史学称者也。数年来所重加修定者，半有成稿，删繁增新，亦可与旧志相为接续矣。余闻之喜甚，即请漱斋山长纂而成之，愿捐俸廉为楮笔篝灯之费。时阅两月，志书成，釐为十卷，曰：“生生长是邦，披阅旧志，即思平和之县立自王文成（见王文成奏疏），何以志取乎‘寇平民和’二字为名？且平和之地，初奏分南靖、漳浦之都图，继割南靖之二里以来属，何以不载阳明覆奏？而沿革乃以南靖之二里指为漳浦，岂本邑现属之地，亦未之知乎？爰考之廿二史，征之邻近府、县志，参稽名贤故老之遗集、山川名胜之纪录，搜

docsriver 文川网  
入驻商家 古籍书城

在文川网搜索古籍书城 获取更多电子书

讨数月，而一邑之沿革乃详。且不独于兹邑确然有征，即闽省、府诸志，亦将自叹其讹以承讹也。盖漳州自五代梁以前，隶于粤之潮州，史未尝有隶于闽之说。而千数百年几经修纂，从无有以史订其讹者，是知志不本诸史，犹济大川而舍舟航也。”余颺其言。今志沿革既征于史，而体例亦仿诸史，俾王志迄今隔一百十有六年皆有考证。以视昔之沿革混而无源，疆里不知所向，山川略有其名，建置如城池廨署之属居址、创修莫可得详，职官人物祀之于祠，名无可征、行无可传，相去远矣。盖此志之参稽修饰，苦心独运，非深于文学者，讵能知之乎？然而学实并笃、文华日盛，我国家运会之隆，为亘古莫及。故鼓吹升平者，匪独清庙明堂追踪雅颂，即散处于儒林泮沼，其人才之富，岂可以数记耶？吾知有是作者，自有其识者，谨序其颠末以竣。

道光十三年癸巳端阳  
署知县事昭文黄许桂小山氏序

## 原序

### 序

明大理寺正卿 王命璿

盖闻古之君子，膺民社之寄，提军国之衡。其所颺采辑者，虑旷久而易湮，而实于体国经野提躬范世之本务，未尝不深思而熟计也。

和故古绥安地，巔崖峻峭，盘谷漫衍，为漳右臂。王文成倡导东南，辑宁疆土，疏之治焉。迄今人文骏发与诸邑齐驱，所从来矣。旧志略而未备，而风气不无递新，政教间有互异，镜古者胡能无全豹之憾乎？文未丧天，道且行地，于是江藩朱公（讳统毓）以天潢嫡派，参画吾漳，承摄兹篆，历层峦之雾列，抚俊彩之星驰，教诲生聚，不憚拮据。乃于退食之余，翻阅厥帙，而见夫大贤创建，允越寻常，讨论修饰，应在后人。用因旧史之遗文，加以删削之大义，上自正德、嘉靖，下逮天启、崇祯，收其放失，悉为詮次。间于樽俎之内，寓乎折冲。诸如严城池，设团隘，练乡兵，编家甲，为戢御计，弊无不剔；又如修文昌，葺西桥，新房科，刻县志，为整顿计，利无不兴。甚而绿林窃发，督兵俘馘，竖从来未有之功，斯不亦岿然底定，与文成荡平之勋千载一辙哉！

志成，凡若干卷。而索额于不佞，承命甫慙，方在鞅掌，披诵孔彰，尤不禁乐善之怀也。因而思曰：古列国各有史官以掌道方志，汉司马迁采上古方书而传志作焉。凡以著山川之险易，验俗尚之淳漓，考人物之盛衰，订治道之得失，而为当世法戒之林也。

萧何方入秦而遂收图籍，文翁一化蜀而遽敦典刑，在昔名世

莅臣莫不以载辑典籍为本务。公今以维城之亲摄如舍之篆，一种和平用以提吾躬而范斯世；其聿修乃志也，于以轶方书而追史册，真不啻萧之于秦而文之于蜀也。炳炳乎，烺烺乎，体国诃谟经野远略也。宁颯颯然以采辑旷久为夸诩耶！

故尝考之，地不特以志重，抑亦以人重，河阳、单父皆以人而传者。和有志，而公以和传，和亦以公传矣。不佞幸读公志而漫颺一言，以志公之不朽，亦以垂和之不朽矣。敬援笔而为之弁云。

## 序

明都御史 王志道

余生长吾郡，足迹未尝至平和，临海王侯（讳立准）为令，数为余言，平和大峰山之胜也。丙子之冬，侯以迁秩过余山中，曰：“行矣！大峰之下殆将有伏莽焉。令在，仅能使不发；令去，视事者其有忧乎？”侯行，果蠢蠢起。视县事者大以为畏途，于是豫章宗彦判郡朱公（讳统毓）往。

盖漳连岁忧海，而粤寇之匪茹者首被于平和，鄙之不逞，稍稍应之。公至，亟治应者，先戢良而徐分暴赖。往未逾月，上俘馘于幕府者数，至必以核，道路以通。余所闻于前令之忧，为之顿释。比公得代，手一编见示，则《平和县志》也。方弛抚馭即就编摩，经武纬文同时并出，虽古之茂宰所未有也。

平和之为县，自王文成始置，至高安谢令（讳明德）始为之志。是时，县犹未文物也。百余年来，民自靖而安、而富、而教，事则自质而文，治则自草创而经纬，而补救日新矣。富教则宜志，文则足志，补救日新则不可以不志。毋如吏其土者，才有所不暇，而视有所不急何？惟公才敏而瞻，识朗而周，尽心民事，然必准古酌今，以备拟议而变化之。故视纪载为经世务之首事，而诘奸之下，并兴载笔之役。数月署令，举百年之坠绪，不

日其成。夫非独文武才也，全文武才，而以整以暇，始足以见公耳！

漳之为郡，自垂拱丙戌，四百九十余年而志未立。淳熙守綱始创之，嘉定守汝谿始修之，淳祐再修，而又始终于教授崇珙之手。是三公者，皆宋宗彦也。本朝旧制，宗室不授吏事，神祖始开之。漳之得徵，惟翰惟城之宠始自公，而一试县，遂成《平和县志》。漳之志事，岂于天潢之籍有系属焉者乎？但宋以太守政成为之，今以数月署令，且在桴鼓，干掇之隙举之，神武钦文之裔，固非天水涓流所可望其后尘矣。昔范宣子夸其帝胄以当不朽，而穆叔以三立诃之。如公者，以神明之胄备三立，真不朽矣。而后乃今大峰之墟，匪宁日靖，兹山也，且藉今志以名于世矣。

## 序

明官詹学士 黄道周

今幅员之广，即穷竖亥之力，亦不能悉其川原之隩隈、名物之繁曠。自龟书出而升沉，纪、传、志之设，久而征，征而传；积邑以知郡，积郡以知省，积省以知天下。虽亿千万禩，犹如一日。

平和之有县也，自王阳明督抚始也。县之有志也，自谢前溪令君始也。其盘山互岭，浚谷纡原，凹凸巖嵒，洄泐派汇，上控汀漳，下搯交广。先是重关设险，以备门庭之不虞，第不如置邑之固也。经百余而生齿日繁，垦辟日溥，风气日趋，能不高岸为谷乎？能令清飐遍为冷风乎？能使泉獍革面而怀音乎？能嗷嗷安堵乎？此皆令长事也。

祇园朱先生（讳统毓）以藩裔膺题舆之命，职漳郡司农，征其逋赋，寄干掇焉。下车而贤声载道，适平和乏令，当道以先生吏绩最优，屈旌舆而下掇。先生一日居于其署，便一日业于其

官。孰催科而抚字，孰防御而克诘，时其征敛，作其团伍，陈其纪纲。寇发则穷捣其穴，取疮痍而噢咻之；以时进其儒英、课其艺业，淳淳然忘其通守之尊，若慈母之抚循其子也。一日，阅县志，叹曰：“是百年来之懿迹几坠矣，后此者当何如矣！”志也者，以征事尚其实而胶柱可虞，以立辞取其简而居要斯难。先生以淹纂之才，直任笔削，畅探荒极，稽验迁圯，明利害之响，剖离翕之差，谢朝华于已披，启夕秀于未振，数月间垂不朽大业。是固胸有成臠，藉此专城，而一奏其善刀之砉然者也。信足以下定民籍、上辉帝采矣。徒曰谱牒之奥区乎哉！

## 序

明谏议 何楷

平和居漳郡西南陲，在职方为新设之邑。当正德间，芦溪、箭管诸巢寇出没叵测，汀、漳实靡宁宇。时阳明王先生督抚南赣，发二省兵定平其境，请于朝设立县治，割南靖、漳浦二里以丽之。于是乎，虎遁迹而泉革音，莅兹邑者惴惴然劳来安集之不暇，毋亦拮据捭租以固吾圉焉，暇谋及文献事。阅再周星，为嘉靖乙巳，江西谢前溪公来宰是邑，学有要领，宗阳明议论，谓“前绩不寻则不继，后绪不继则无征实”。创修县志，迄于今且百年矣。其间气运之升降，户口之繁凋，人才之盛衰，风俗之醇漓，阨塞之迁徙，政教之兴坠，沿革之互变，是未可以因循而理也。

祇园朱先生（讳统毓），派出天潢，以干练之材司郡，储峙逋县，隐核兼职。督奸不以批抵为事，奸发辄禽，凡两造之质于庭者，毋不输情快心以手加额而去。其慧根剴割，若刘穆之之五事具举。当事者悉先生治状，适平和乏帅，命先生守。兼以大府之尊行孔迳之化，数月间阗阗有声，犹诸中牟单父然。

夫宰邑者寡不薄视山县之简朴，支持岁月以祈无咎无誉，谁

能以父母之真心行之？先生之摄斯邑也，至则练乡兵、严保甲、修险隘，为弭盗安民之策，绸缪拮据，殚极心力。偶芦溪流劫猖獗，蜂结蚁聚，先生督山崩土团，直捣其穴，执讯获丑，一方藉以救宁。又以暇时，修其津梁，庀其祠宇，葺其廨舍，不忍以寄旅之迹视之。盖体皇上锡极之德意，以沛维城之徽猷，为宰邑者之献仪。曰：孰是丛岨之区，居汀漳要害，而兴革损益，不以告后之君子，况礼乐百年而兴，兹正其时也。因取前志而胪分缕析，增所未备，广其不及。举洪巨于包带，极纤微于营纬；尽山川之启塞，阐科条之参钩；同蔚宗之旨趣，肖孟坚之铺叙。自设县以来，宰不一人，人不一政。论述则荣于华衮，贬斥则凛于铁钺，实文治旁魄之日，旷绝之觚翰也。昔常璩志华阳，广微志吴地，并以鸿笔垂为信史。是编信兼美于前，而不徒为一方一隅之书矣。是为序。

## 序

明吏部侍郎 卢化鳌

国家治化翔洽迄于遐外，吾漳在闽最南，雅称衣冠文物之乡，与望国齿。诸邑基置草昧于唐，自宋元以来，渐次云峙。独平和肇基于王文成，幅员新启，连诏控饶，号为岩邑。方文成视师至河头也，采舆人议，疏请分畿。盖是处山川修阻，非得贤令长拊循弹压之，则西鄙不净，赤白丸得阑出入，狼卜豺祭无复已时，故建治急焉。今百二十年，家弦户诵，蔚为华眷，簪裾继踵，半用经术致身，其他才技亦足自展。次者为善于家，力田孝悌，出其赋役，廛市偕作；有事则荷戈带甲，以辟于四郊。故祸变旋戢，峦岫交枕，遂得齿于他望县。而文献残缺，非所以彰往而诏来也。

王制曰：广谷大川异制，民生其间异俗，刚柔轻重迟速异齐，五味异和，器械衣服异宜，此数者亦何关于鸿巨而任其无

征？则地利不必习，兴废不必详，灾祥不必警，户籍簿正不必正，舟车津梁宫室不必具，风俗习变黻佩戴衽贞邪士女不必考，官师胥吏劝垂不必兴，生殖器用桑泉百货不必察。如彼行迈，错趾全迷，艰于问途，得无为五都之市所笑哉？譬之冶者，辨土而埴，砺器而施，眊其正反，攻其坚瑕，若痲之患不作，而后乃称良工。今夫民牧，亦一邑之冶师也。因时创立，俾有艺极；京庾得储，老幼得序；治农于籍，蒐于岁隙；妇子蜡腊，跻公献寿。不至灾沴阴阳之变，无复沉命坐累之忧，则国家建设之意与巨贤蹠导之功两无负焉，此志之不可以已也。

先是，嘉靖间明德谢公始得辑之，存其梗概，以待后之增修。若百丈之泉，必时时而续之绠，斯得汲也。近临海王公（讳立准）有事属缀，会迁去不竟。今宗侯朱公（讳统毓）甫署篆，遂博采精核，爰成新志。百二十年之事瞭然指掌，如明镜长悬，逋发毕照，可细按而徐为料理。其于修教举政之旨，不既十全乎？予惟视民于斯者，莅相承也。而山川之所动荡、功烈之所肇造，岂非在其人哉！匪为不经而侈厥度，游刃引割恢及编摩，公之声绩烂然在双髻、九岭间矣。若乃捣巢获丑之劳，载在乘中，不复述云。

## 序

明署邑令 朱统毓

邑之有志，犹国之有史也。一日不备，则无以征往而诏来。而况生齿之凋繁，陵谷之迁变，名物质文之升降，十数年间，时更而景辄异。即以兹邑观之，创辟方百有余载，昔也荒莽，今为乐郊；昔也犷獠，今为谣俗；巨公名流，挺生鹊起，诂可令杞宋无征、文献不足哉？

余不佞暂摄斯篆，询其逸事，鲜有能知者及稽其纪载，则已版蠹而字湮矣！前令临海王君欲修，举而未竣，竟以迁去。因不

揣案牘之余，商正先达，特加辑订。择博雅诸生佐成之，务芟浮蔓，葺阙遗，期于典核可传。后之君子得而变通润泽之，则一邑之志，庶乎不刊矣。



## 原 跋

明邑令 杨 清

不佞于丁丑季夏之十日来知平和，适遇萑苻啸警之余，出入靡常，往来飘忽。宪檄之督捕者，日至如雨，不得不惴惴焉。日以编甲厉兵、安良戢暴为事。陟则岷，降则原，山泉之胜，亦每每以驰驱困顿之中失之；又乃况乎钱谷之几何人，户口之几何数，险阻要害之几何布列，民风土俗之几何敷陈，高贤事业、名世文章之又几何传法。譬之盲儿问道，盖怅怅乎不知所之！

忽有携平和新志来者，披阅一过，文不繁而义已尽，肯綮星炳，余绪丝分。不觉抚志而嫣然曰：“两月来不知平和，今知平和矣。开我蒙，振我觉，惟此志矣！”问：“何以得是志？”曰：“得之圣裔祇翁。朱老大人以巡储署和，不数月而幡然新之者也。然则，不佞之稍有知于平和，不在不佞任平和之日，而转在祇翁署平和之日。平和无祇翁，则平和无新志；平和无新志，则知平和者将何以知平和？繇斯以观，知平和者世世将祇翁之造，知于知平和者亦世世矣。”于是请为之跋。应之曰：“不佞无可为志赘，将赘是以志新是志之祇翁云。”

## 重修平和县志序

清朝汀漳龙道 李 铨

和为漳郡西南治，先未设邑。自明正德间，象湖、箭管等处，群寇蹂躏，维时王文成公督二省兵歼夷之。遂允众议，请于朝，割南靖、漳浦二里以建县治，迄今盖二百余年矣。顾其地连粤境，且多深山邃谷、险阻扼塞之区。宰斯土者，抚字之方与防御之术二者兼行，斯足以嘉惠民生而诘奸戢暴；不然，鲜有不掣肘而覆坠者矣。然其间先在知一邑之大要若何，而利者可兴若何，而弊者可革若何，而风俗之漓者可变而为淳若何，而疆域之险且僻者可安靖而无患。苟非征诸文献，因地制宜，其何以措施悉合，无戾于体国经野之意？则志乘一书顾可略而不备乎！

乃和志自有明朱别驾摄县修辑后，历有年所，颇多残缺，曾未有人继其事。不独职方之掌未备，而且民风土俗、山川险要，以及钱谷兵刑、人物政教，茫无考据。则虽欲噢咻我众庶，保固我疆陲，其道无由也。

轩六王令尹以瑯琊世胄来宰于和，以为知一邑事而不知一邑之大要，不可以为治；欲知一邑之大要而不考之于邑乘，亦不可以为治。于是毅然起而重修之。蒐罗参订，增缺补残，一邑之大要尽在目前，为治之大端亦瞭如指掌。告成之日，适当进职之时，将税驾北行矣。而犹不忘所事，问序于余，余曰：“是举也，岂独继朱别驾之芳徽，传百余年之文献，于以昭示来兹。凡宰斯邑者，其开帙而知一邑之大要，庶不乖于因地制宜之治乎？则修志之大有造于和也，岂浅鲜哉！”

## 重修平和县志序

清朝漳州知府 李秉衡

今天下车书一统，风俗大同，国典通志，彪炳辉煌，班班可考矣。使天末荒陬，穷乡下邑，纪载未备，亦非所以昭极盛也。

余奉命守漳，甫入境，问各属志乘，虑恐阙失，慨然有厘正之志。是时，适奉宪有纂修之檄，遂遵而转行之。于是，溪邑江君首告成事，余既喜而序之。和令王君亦相继告竣，复来请序于余。

余惟平和为漳岩邑，介闽、广之交，山重箐密，崎岖深阻。宰其地者，方惴惴焉，虑盘错之不暇，而王君独恢恢游刃。政事之余，乃能订疑补缺，博访广谘，综其山川风物，手自删定，可不谓留心民物、通达治体者欤？

志甫成，而王君以升任去。贤宰之治，未竟厥用，而百里间之形势、习尚、建置沿革瞭如指掌。余将藉手以仰副各上宪振兴文教，鼓吹休明之盛。而继王君之后者，亦得所考据，以善经理节宣之用，则斯志之成也。诂为一时之胜事已哉？因为序，以弁其首。

## 重修平和县志序

清朝进士、吏部观政 昌天锦

邑之有志，作于前，述于后，浸旷而举，几绝而续，率皆百年后兴。而其兴也，盖必有大贤者为之宰，以其恢恢游刃之才，肩起衰振废之任。而后旷者举，绝者续。

平和之志，旷绝者将百年矣。琅琊王公宰邑之数月，慨然念文献无征，谋诸绅士，申请于当道列宪而重修之。值余方以艰家居，不知其鄙也；命使者具书币，介茂才游君宗亨、曾君惠中而属余载笔焉。予惟文章之道，史才尤难，志乘亦史之遗也。顾余何人可预其选？矧予生稍晚，不及见百年以来故事。而和又僻远，予虽生同郡，未尝履其境，览其山川风物，与其士大夫交游，聆其轶论，有所睹记，其何以襄盛举哉？乃公转以其足未尝相过，口未尝相授者；谓可以奋笔直书，无所回互左右于其间，为雅称是职也，而强起之。予勿获辞也，爰请诸公，招予友孝廉蓝君三祝偕往即事焉。自戊戌之冬，迄今己亥四月而书竣。

盖自胜国丁丑以前，悉准诸旧志，而稍订其繁伪，以后则若规制、风土、户赋、兵防，皆按诸《府志》及他吏牍而增修之。至其人物、仕宦、隐彦、闺贞，则皆俾陈牒于公，精核其名实，而始登于志。

盖公之于是志，至详且慎，务使百年文献必可信今而垂后，诚所谓大贤者也。愧予不能抒写潘文、导扬乐旨，第不敢信疑传舛、创矜臆获；兢兢然指事属词，于大贤之用心，庶几无负尔！若其拘牵肤陋，樸橄少文，则所不敢辞者已。

赐进士出身吏部观政邻冶  
年家弟昌天锦顿首拜书

## 重修平和县志序

清朝平和知县 谈经正

和之建邑自有明正德间，邑之有志，始于嘉靖乙巳，终于崇禎丁丑也。屈指百有余年，山川风物，草昧荒略。虽前溪载笔于前，祇园踵事于后，而和志终未得为完书也。且由胜国末季，迄我兴朝鼎革，其间时事之治乱、政教之得失、风土习俗之变易与夫节义、忠贞、幽芳、潜德，亦略可纪矣。又况国家承平日久，太平之泽垂六七十年，沦洽涵濡，文物礼乐，日新月异，山陬海澨，穷乡下邑，盛美轶事，史不胜数也。而迟之又久，时远事湮，文献无征，传闻互异，后之人于若信若疑之间，依稀仿佛，欲续坠绪，莫由也已。百年之间，第见山高水深，宁非和邑憾事哉？是和志之修，较重于前，莫为之后，虽盛弗传也。

予自新授和邑于都门，访漳郡耆宿，问和遗事，无能言者；间得一二民风土宜，所闻异辞，亦略而弗详。是岁七月之秋十有一日，乃得抵和任事。履任伊始，方如面墙，而王君轩六适自省旋和，授以新成和志一帙。披览之余，疆里、土物、建置、沿革区分缕晰，历历指掌间。因叹王君蒞和未久，旋晋职以去，纷纭盘错之际，独能绰有余地，遵宪檄以成不朽之盛事。而才短识暗如予者，于甫任和邑、茫无绪理时，即得是编，有所考据，以遵途不谬。此予之私幸，而抑又为和邑幸，并为凡蒞和者幸也。则王君此举，讵惟两朝文献勒成完书，其所补益于地方民物者岂浅耶？因喜而为之序。

康熙五十八年己亥七月既望

知平和县事年家眷寅弟荆南谈经顿首拜撰

## 修志姓氏

平和县志

重修

署平和县知县加一级 黄许桂（字小山，江苏昭文人，监生）

纂辑

吏部就职教谕里人 曾泮水（字漱斋、援贡）

校正

生员 曾震泽（字定侯）

第七卷

人物：名臣 宦绩 理学 忠节 孝友 义行 儒林 文苑  
隐逸 附流寓 仙释

第八卷

列女：节孝 节烈 贞女 烈女

第九卷


冢墓 寺观 典籍

第十卷



风俗：士习 民风 农事 女工 饮食 商贾 衣服 歌谣  
墟集 乡饮（附）


第十一卷

物产 祥异 杂识




平和县总图





三平山图



大峰山图

大峰山

## 平和县志卷一

## 建置沿革志

维邑肇名，文成辟土。社曰平河，章奏可睹。怀恩始唐，南胜胥宇。隶粤隶闽，如身之祖。史岂危言，志溪弗取？待旦仰思，迂固是矩。若网在纲，众目毕举。征献考文，于昭述古。 志沿革第一

平和之立县也，自明代始。及溯其疆土之所系而分，固《禹贡》扬州之南裔，而七闽百粤交汇之区也（宋奉议郎漳浦吴与《图经·序》云：“按本州在《禹贡》为扬州境，固为七闽地，秦汉为东、南二粤地。”）。山川既辟，名号统属更易不一，上古远矣。秦已并天下，分郡三十有六，又取闽越地置闽中、南海诸郡以为附庸。汉初，南海尉赵佗据有南越以自王。武帝元鼎六年，平其地为九郡（见《史记·世家》），<sup>①</sup>南海属于交州，东汉因之（见前后《汉书·地理志》）。三国时属吴，分置广州，以南海隶焉（见《三国志》及《晋书》）。晋成帝分南海立东官郡（见《晋书》）。按：《广东通志》云：“永和<sup>②</sup>六年置郡，分揭阳为四县。”。义熙九年，又析东官置义安郡（按：《广东通志》云：“即今潮州府”）。领县五，曰海阳、绥安、海宁、潮阳、义招（按：刘宋时建安郡别有县曰绥成。云永初时郡国，非此绥安也。

<sup>①</sup> 立九郡事载于《汉书·武帝本纪》。

<sup>②</sup> “永和”疑为“咸和”之误。

又按：《漳浦县志》注引《潮阳志》，绥安属义安郡。今漳浦八都有绥安溪，而浦志乃误作建安郡之绥安。刘宋、南齐并因其制（《南齐书》增置程乡县）。梁普通四年，分扬州、江州置东扬州，以义安属之（见《梁书》）；后改义安曰羸州，析海宁立龙溪县，并闽与建安、南安为县四，以属于闽之晋安郡，仍统隶于扬州（见《隋书·地理志》。按：《广东通志》、《潮州府志》俱云，梁普通后，析海宁置龙溪县，以属南安郡，即今闽之漳州府龙溪县。漳州嘉定志作大同六年立县。）。及隋平陈，省义安（按：《潮州府志》，陈永定中，废羸州，乃置义安郡），置潮州。开皇十二年，又割并兰水、绥安二县入于龙溪，属建安郡（见《隋书·地理志》。按：兰水立县始末，各史无考）。此龙溪立县归闽之始，亦即平和附隶以始归闽也（按：福建省志及漳州府、县各志，皆于梁以前以龙溪属闽，辨详后论。）。盖龙溪之地在粤之潮州，则届于东北；在闽之泉州，则届于西南，而平和又极闽西南之尾，而粤东北所首入之地，故曰龙溪之归闽，断自于梁，即平和隶闽之始也。龙溪既归乎闽，则闽之见于前史，溯原求朔其分合之故，又可征而参论矣。

考建安之为都，由隋而上，自后汉析冶县分立会稽东南二部，其南部则称建安都尉（见《宋书·州郡志》。按：福建省志及续省志云：“永和六年，分会稽南郡为建安都尉。建安初领县五：侯官、建安、南平、汉兴，其一史阙书。”遍考诸史，并无领县之说。又注曰：“侯官今福、兴、泉、漳四府。”是未知龙溪先漳州而建，梁以前尚属粤地，安得汉时漳州即隶于侯官？）。吴永安三年，改南部都尉为建安郡，始领县七（见《三国志》。按：《晋书·地理志》云：“吴置建安郡，领县七：建安、吴兴、惠[东]平、建阳、将乐、延平。”而《福建续志》云：“领县六，增绥安、侯官、东安三县。”《泉州府志》又云：“领县九”，无绥安，俱与史互异。）。晋太康三年，又分建安置晋安郡，领县八

（《晋书》：领原丰、新罗、宛平、同安、侯官、罗江、晋安、温麻八县。）。自是分立两郡，迄于宋、齐、梁之世，至隋乃复合为建安郡。而溯治地之由来，则即前汉时闽越王无诸所都闽中郡之故地。后汉时乃称东侯官（见《史记》、《前汉书》、《宋书》）。《周礼》所谓“七闽”者是也。五代时，建安在陈，改曰闽州，又为丰州。隋平陈，改曰泉州。大业初，又曰闽州，旋复为建安郡（见《隋书·地理志》），而龙溪、平和则梁以前固未尝属于闽越与冶与侯官也。唐武德元年，改天下诸郡为州，置都督府。六年，分泉州、建安郡别置福州。贞观元年，又分天下为十道，其扬州所属均隶江南道。嗣圣三年（武后垂拱二年），析福州西南境置漳州，以南有漳水而名，并置漳浦、怀恩二县。州治建于漳浦，隶江南道福州都督府（见《唐书·地理志》），此州以漳名之所自起，而怀恩县在漳浦之西南，即云霄镇（见杜氏《通典》）。今平和之地与云霄犬牙相错，然则昔之漳浦与怀恩分治，犹如今兹之与平和分治。则怀恩为平和有县之始，疆里固自井井可按也。中宗十六年（武后圣历二年），又析泉州之南安、莆田、龙溪置武荣州。次年州废，还隶泉州，十七年（武后久视元年），复置。景云二年仍名泉州。开元二年，（吴与《图经·序》、朱子《题名记》俱作四年），漳州徙治李湾川（《漳浦志》云：“即今县治。”），去旧治北八十里。二十二年以漳、潮二州隶岭南道经略使，二十九年乃废怀恩入漳浦，割泉州之龙溪归于漳州。天宝元年，福建经略使复领漳、潮二州（吴与《图经·序》作开元二十八年）；寻改漳州为漳浦郡。乾元元年，改经略使为福建都防御使兼宁海军，二年漳浦郡复为州。十年，<sup>①</sup>漳、潮二州又隶岭南经略使。贞元元年（《唐书》作乾元元年，今从朱子、吴与二家序说），漳州更徙治于龙溪，即今郡治地也（以上参考《唐书》、

<sup>①</sup> 按：唐肃宗乾元年号只有二年，十年恐误。



吴与《图经·序》、朱子《漳州守臣题名记》。

景福元年，王审知破伪留后范晖，尽有福、泉、建、汀、漳五州之地。唐昭宗以福州为武威军，拜审知节度使，旋封琅琊王。梁太祖时进封闽王，升福州为大都督府。审知三传至王延钧，据福州称帝。建元号国曰闽（时后唐长兴四年）。又再传王延羲，兄弟相攻，为其都将连重遇所弑。其弟王延政亦自立于建州，僭号称帝。闽中诸郡皆乱，南唐李景遣兵进破建、汀、漳、泉四州，迁延政之族于金陵。闽自景福初至保大四年（后晋开运三年），属于王氏者凡五十五年。南唐改泉州为清源军，置守兵于诸郡。泉州留从效闻福州李仁达降于吴越，遂逐李景兵，据有泉、漳。李景即授从效以节度使，封晋江王，并以其将陈洪进为统军使。建隆元年，留从效称藩于宋，旋卒。陈洪进复逐张汉思，自称留后。南唐李煜又即以洪进为清源军节度使，泉、南等州观察使。时漳州以从效军将董思安私讳，改为南州故也（以上参考《唐书》、《五代史》、《南唐书》、《宋史》及朱子《题名记》）。乾德元年，宋始受洪进朝贡。二年改清源军为平海军，授洪进节度泉、漳等州观察使（朱子《题名记》云：“是岁<sup>①</sup>始诏南州仍为漳州。”）。太平兴国三年，洪进献漳、泉二州于朝。自保大四年至是，泉、漳分据于留、陈二姓者又三十有二年。

宋既统有中国，至道二年分天下为十五路，天圣中析为十八，元丰时又析为二十三，高宗南渡驻蹕吴会，所存者两浙等十有五路。漳州漳浦郡领县四：龙溪、漳浦、龙岩、长泰，均统隶于福建路（以上见《宋史》。按：福建省志及续志云：“太平兴国三年，陈洪进及钱俶俱纳土，复为威武军，领福、泉、建、汀、漳、剑六州。省赣州，析建州邵武县，置邵武军，属两浙西南

<sup>①</sup> 按：《题名记》云：“我宋乾德四年，泉州陈洪进以二州版图归王，府始诏复故号”。

路。四年析泉州游洋镇，置兴化军。雍熙二年，改为福建路。景德三年，置安抚使。大观元年，升为帅府，四年罢。建炎三年，复升安抚使为帅府。”与《宋史》微异。）。时平和应属漳浦。德祐二年，端宗立于福州，改元景炎，升福州为福安府。以黄恮为福建提刑招抚使，知漳州，备御下三郡（《宋史·本纪》）。元至元十四年（宋景炎二年），发蒙古汉军都元帅张宏范攻漳州，得山寨百有五十，立行宣慰司，兼行征南元帅府于泉州路。十五年，改宣慰司为行中书省，升泉州路总管府，十六年宋亡。十七年置行中书省于福州，徙泉州行省于隆兴路。十八年改漳州为路，领县如旧（《地理志》作十六年），还泉州行省于福州路，十九年<sup>①</sup>仍并入福建行省，罢福建道宣慰司，复立行中书省于漳州。以后或复设于泉州，或立宣慰司隶江西行中书省，或改为行尚书省，或为江西行枢密院，治汀州。大德元年，改福建省为福建、平海等处行中书省，徙治泉州。二年立军民宣慰司都元帅府于福建，改泉州为泉宁府（以上俱宋、元史本纪、地理志，其所载多参差重复，故并合叙之。）。

至治中，析龙溪、漳浦、龙岩等县地置南胜县，建治于九围矾山之东，偕龙溪诸县隶漳州路（见南靖、龙溪、漳浦各县志）。至元三年，南胜县民李志甫作乱，围漳州城，守将搠思监（一作蓝）与战失利，诏江浙行省平章别不花总浙、闽、江西、广东军讨之。六年，漳州义士陈君用袭杀李志甫，授君用同知漳州路总管府事（见《元史·本纪》。按：漳州府、县各志云：“至元三年，畚寇李胜等作乱，杀长史晏只哥、同知郑晟、府判喜春令。万户张哇哇讨之失利。邑人陈君用袭杀胜。”与史微异。）。乃徙南胜县治于小溪瑄山之阳。矾山在今县治东百二十里，俗谓之南

<sup>①</sup> 按：《元史·世祖本纪》九：“至元二十年三月并泉州行省入福建行省。”

docsriver 文川网  
入驻商家 古籍书城

在文川网搜索古籍书城 获取更多电子书

胜社。瑄山离县治百里，俗谓之旧县。两山相隔四十余里，是又平和再建有县之征也。至正十六年，改福建宣慰司都元帅府为福建行中书省（见《元史·本纪》）。是年南胜县尹韩景晦以瑄山地僻多瘴，乃复徙于双溪之北，改名南靖，即今南靖县治，平和皆其所辖之地也（见旧志）。二十六年以福建行省参知政事陈有定为福建行省平章（见《元史·本纪》。按：《明史·本传》：“至正中，置分省于延平，以陈有定为平章。”），尽有福建八郡之地。明洪武元年（元至正二十八年），遣兵取建宁、延平，陈有定被执，死之。福州破，兴、泉诸路降，招谕使至漳州，达鲁花赤迭里弥实破印绶，拔佩刀自刎（按：《元史·本纪》以是年兴、泉、漳、潮四路皆降，与迭里弥实本传及《明史·陈有定传》微异。）。漳州路归于明，升漳州路为府。二年，仍置福建等处行中书省。七年，置福州都卫与行中书省，（同治<sup>①</sup>）八年，改都卫为福建都指挥使司（按：《明史·地理志》云：“边境海疆则增置行都指挥使司，凡五，福建其一也。”而“福建省”条下只载都指挥使司，不载置行都指挥使司。）。九年，改行中书省为福建承宣布政使司（见《明史》），漳州府属焉。

正德二年，汀、漳寇盗窃发。八年，乱益甚，南靖之芦溪、象湖、广东饶平之大伞、箭灌（一作箭管）等处山寇连结，恃险猖獗，三省骚然。十一年冬，乃以都察院左佥都御史王守仁巡抚南赣、漳、汀等处。十二年春，守仁进屯长汀、上杭。先后檄示方略，命福建按察使司兼分巡漳南道金事胡珪、漳州知府钟湘等会闽、粤兵，破长富村，进攻象湖、流恩、芦溪、可塘、大伞、箭灌巢穴三十余处。渠魁既歼，抚其余党，不三月而寇平。夏五月，守仁乃因生员张浩然、乡老曾敦立等

<sup>①</sup> “同治”疑为“弘治”之误，然弘治元年上溯至洪武初，相去达百二十年，似亦不对，姑且存疑。

合词呈请，奏割南靖县之清宁、新安等里，漳浦之二、三等都，添设县治于河头。九月，进守仁提督南赣、汀、漳等处军务，许以便宜从事，讨江西、广东、湖广连界诸贼；又以平漳寇功，升俸一级，加赐赏赉。十三年冬，守仁再议以南靖县清宁里七图、新安里五图，共一十二图分为一县。建县治于河头大洋陂，以其乡故属平和社，请名县曰平和，属漳州府。又割龙溪县之二十一都七图、二十五都五图，共十二图，以益南靖县。其原议割漳浦县二都二图、三都十图，以地隔平和远，弗便于民而罢。又移南靖小溪巡检司于漳汀枋头坂，改为漳汀巡检司，属于平和县。亦因故地名以名之，非别有取义也。盖县之称平和，由王守仁而始。而今日之可考信而知者，亦莫如王守仁之手疏为定也（以上采《王阳明全集》。按：《明史·地理志》载：“平和县，正德十四年六月，以南靖县之河头大洋陂置，割漳浦县地益之。东南有三平山，东有大峰山，河头溪所出，分数流达海，又西有芦溪流合焉。有芦溪巡检司，后迁枋头坂，改名漳汀巡检司。”此仅见阳明原疏，而未知其后有再议。又讹小溪为芦溪，不知芦溪即近枋头坂也。又按：旧志艺文仅载阳明初奏，而沿革仅采复奏，且以县名为取“寇平而民和”之义，尤为荒略。）。

明既亡，唐王聿键立于福州，僭号隆武，改福州为天兴府。大清顺治三年八月，我兵破汀州，唐王死于福州（见《明史·诸王传》）。九月，大师由漳平北溪入漳州城，平和遂与龙溪、漳浦、海澄、南靖、长泰、龙岩、漳平暨诏安、宁洋十县归附版图，仍隶漳州府，并隶分巡漳南道。康熙六年裁漳南道，十七年设分守汀漳道，二十一年复裁，二十四年仍置，统隶于福建省承宣布政使司，而上隶于福建巡抚、闽浙总督。雍

正十二年，分龙岩县为直隶州，割漳平、海宁<sup>①</sup>二县属之。漳州府领县七，平和县次第五，遂为定制（以上采省、府各志）。今溯其有土以来之所系属，下迄于明正德十三年建立今县，至国朝道光十三年，凡为县三百十六年，以垂之万有千年。而唐之为怀恩、元之为南胜，其疆里固俱按图而可稽，征之前史，详而述之，其亦闽南之名邑也乎！

论曰：邑之有志，犹身之有谱，必溯其所自出，而后身之大宗、小宗与高、曾、祖、父之积累而有是身者详焉。旧志《沿革》纪自南胜，岂元以前数千载此土尽荒远无所系隶欤？而《艺文》仅载王阳明初奏立县一疏，《沿革》并遗其复奏，以致分地混淆，又以意解释平和命名之故。志以求明乎邑之所由来，而乃滋之感也何居？于是穷日夜考之二十二史，得其源矣。证之邻近志，还以质之福建、漳州省、府各志，彼此沿袭，讹以传讹，其详于史与显著于吴奉议、朱子及王阳明之文者，皆废而弗观。於戏！文简而事详，名史之要，固源委混淆而不析者，亦得藉为口实耶？夫龙溪之有县也，先于漳州，其县自梁始分自粤之羸州海宁县以来，归于闽之晋安郡。晋安者，今之泉州府，羸州即潮州也。岂有龙溪地当西南之首，古属于粤，而漳州后建之郡邑，能先于梁，越西南之界以属诸闽与治与侯官乎？盖尝譬之，粤之潮州则漳州之本生祖父母也，闽则其继祖父母也。陵谷互迁，山川异号，而求淮泗者必本《禹贡》之旧，递求历代更徙移易之渐，而河源乃不紊。盖史者志之源也。或曰：“史可尽信乎？”曰：“固也，史总天下之全志，地近而文献可亲，要其纪载沿袭之舛讹，必引据某书、某人之说以辨析其疑义，而言乃为有征。省、府各志亦称博洽

① “海宁”应为“宁洋”之误。

矣，而所纪与史参差互异，乃茫无从考其说之所自。且龙溪之昭著于史与他志者，先已抵牾混淆其源如此。夫无征不信，吾安能舍所可信，而信其无可征者而袭之？考经数月，斯篇始成。然而数十年形势分合，以治以安，非独平和一邑之本支厘然，即以大宗、小宗上拟于全郡、全省。其割并以固乃封守者，亦约略可以得其继述之因。我熙朝文物日臻于盛大，舆图无有纪极，是又岂前此之务荒略以为简古者所可得而比论哉！

## 疆域志

画井分疆，辟兹岩邑。详其方隅，以别原隰。城有街衢，乡有圩集。遐尔毕昭，中边斯习。险阻既彰，冥顽敛戢。按册披图，展履可及。清宁新安，如响斯给。荡荡平平，熙攘出入。志疆域第二

县境在漳州府治西南二百一十里（小路一百八十里），距福建省八百八十里，至京七千里有奇。

东北往府至南靖城一百八十里。一由山格约上洪濑，抵南靖县之下洪濑界一百二十里，下洪濑至南靖县六十里，至府三十里；一由黄井约，抵南靖之风门鞍界一百四十里，风门鞍至府四十里。

北至芦溪约葛竹乡，抵南靖县之高港界一百二十里。又由葛竹至根竹隘十里，与南靖之高港分界。又由芦溪约曹充隘，抵南靖县之板寮界一百二十五里，至南靖县一百一十里。

西北至汀州永定县城二百五十里，一由坪垵约朱公畲隘西北，抵永定县之暗坑乡一百一十里；一由坪垵约三莱州隘，北抵永定县之泥溪仔，西抵大埔县之安溪墟百丈礫界八十里。

正西至广东大埔县城一百二十五里。一由坪垵约上下樟溪，抵永定县之黄砂溪（《阳明集》作黄蜡溪）、大埔县之大靖溪五十里；一由北关约长富村，抵大埔县之官宅村二十五里；一由西关约赤石岩，抵大埔县之白土乡大伞（《潮州志》作“大产”）二十五里。

西南至广东饶平县城二百里，由西关约安坑乡，抵柏松关与饶平县深圳交界三十里。

正南至诏安县城一百八十里。一由南关约阔竹洋诸佳山，抵诏安县之秀篆界三十里；一由大溪约龙过冈，抵诏安县之赤岭界

六十里；一由云霄约朴树坑下坛保，抵诏安县之描狮桥、漳浦县之竹仔前一百四十里。

东南至漳浦县城一百九十里。一由西林约猴仓乡，抵漳浦县之云霄城一百二十里；又由云霄至山全约官津桥，抵漳浦县之木栅汛二十里；一由五寨约三觉径，抵漳浦县之车田一百二十五里。

自正东至正西广一百八十里；自西北袤至东南二百四十里。辖清宁里，统图七；新安里，统图五。共为二里十二图。

## 城内街市坊里

东曰：东街，县口街，三角街，仓前街，崎街，县后街，将军庙前，水门巷。

西曰：西街，射圃前，关庙前，营门口。

南曰：南街，百岁坊，南校场，石门楼，学宫前，下贤堂。

北曰：北街，提铃巷，长宰里。

## 城外（附郭）街市坊里

东曰：朝天街，福井里，金窑街，半甲街，暇街，东顶街，夏林埔，东坛，长宁街，新建街，三官堂，科第坊，接官亭，泽洋，州主庙巷，知母巷，南山里，崇福堂，东鹅头，溪堂学，黄泥塘，菜塘，顶坝，东山庵，半美渡。

西曰：西校场，大塘岸，霞街，桥头里，西坛，杨福坪，法祖里，土龙巷，栗子园，下巷，栖云岩，水车庵，西顶巷，盐街（悦来盐馆本驻此），大帝庙前，凹上，西河坝。

南曰：霞田，石潭，南门洋，南坛，蕉坑，半径，大洋坡（古名河头社），三角坪，夏屋场，霞湖。

北曰：养济院前，北坛，日观岩，后径，白玉礫（又名礫下），卓凤坑，必发窠，鸟梨凹。

四乡为约二十有四。

**东关约（附郭）清宁里四图**

础溪乡（五里），苏洋乡（十里），田心社（十里），礲头乡（十五里），合溪墟（二十里，设有盐馆），板桥乡（十五里），黄竹坑（二十里），崎岭社（三十里），彭溪乡（四十里），高山乡（四十里），桂竹洋（五十里），岩坑社（五十里），浮坪乡（二十里），承坑社（二十里），榕坑乡（二十五里）。

**西关约（附郭）清宁里一图**

上坪乡（四里），霞坪乡（五里），葵坑乡（十里），祖亭乡（十五里），浒坑乡（十五里），赤草埔（十里），白土岭（二十五里），赤石岩（二十五里），陈莒村（十五里），渡军溪（十五里），箭竹坑（二十里），安坑乡（二十五里），柏松关（三十里）。

**南关约（附郭）清宁里七图**

际夏乡（三里），隍田乡（五里），澄坑（八里），深渡径（十里），坡复里（十五里），阔竹洋（三十里），诸佳山（俗作朱家，三十里），新洋乡（十五里），芹溪乡（八里），白水磔（三十里），东磔乡（三十里），山口乡（三十里），深寮乡（十五里），蔡宅乡（二十里），洋坑（三十里），下大丰社（三十里），冷水坑（三十五里），五雷（见《王阳明奏疏》，今无考）。

**北关约（附郭）清宁里三图**

长富村（二十五里），暇村（二十五里），山顶坪（三十五里），大窠乡（三十里），小礲乡（三十五里），漳坑乡（三十里），长乐乡（三十里），柏溪头（二十五里），梁坝乡（三十五里），佳蕉尾乡（三十五里），上大丰社（二十五里），秀峰（三十里）。

**高坑约（县东）新安里二图**

霄岭社（七十里），白叶乡（五十五里），石盘乡（六十里），高坑村（六十五里），松芦乡（五十里），古草洋（八十里），赤

岭乡（六十里），大头丘（六十里），埔美村（八十里），暇美乡（六十里），梅子坝（八十五里），崛仔村（八十里），内溪村（八十五里），瓦窑村（九十里），河仓乡（八十五里），碧岭乡（九十里），半径村（八十五里），鸪鹑飞村（九十里）。

**宝野（俗名坂仔）约（县东）清宁里二图**

顶五甲（八十五里），井美乡（八十里），虎耳村（九十里），河头乡（九十里），新承乡（九十里），夏美村（八十五里），金京洋（八十五里），早瑞村（八十里），客寮乡（八十里），甘棠村（八十里），后楼乡（九十里），西坑乡（九十里），院前乡（九十里），夏觴（俗作下汤）阁（九十里），石古社（一百里），洞内乡（九十三里），铜壶社（九十五里），古林乡（九十五里），深田乡（一百里），坂仔乡（九十里，设有盐馆），蓝山社（九十五里），径口乡（九十五里），五美楼（九十五里），河角乡（九十五里），寮仔库（一百里），霞田乡（一百里），长相社（一百里），芬溪乡（一百里），圳心乡（九十二里），黄斗乡（九十一里），占美乡（九十里），石桥乡（一百五里），均匀乡（一百五里），赤岭乡（八十里），梧坑乡（一百里），葛坪乡（一百里），凤埔乡（一百十里）。

**洋头约（县东）清宁里一图**

双溪墟（一百里，设有盐馆），高塘乡（一百里），作洛乡（一百里），觴侯乡（百十五里），洋头乡（百十五里），下邀乡（百十五里），寮理乡（一百里），坛仔边（一百里），石露乡（一百五里），水隙村（一百五里），浮山村（一百五里），山坚乡（一百五里），岩传乡（一百十里），亲安乡（一百十里），屏山乡（一百十里），杭浦乡（一百里），柏山乡（一百里）。

**溪州约（县东）清宁里六图**

东坑乡（一百里），横山乡（一百里），溪州社（一百十里），畚坑乡（一百五里），同圃乡（一百十里），内洋乡（一百十里），

鹅毛山村（一百十里），后湖乡（百十五里），宁福乡（百十五里）。

#### 南胜约（县东）清宁里一图

义路乡（百一十里），云寮村（百三十里），梨仔坑（百三十里），法华乡（百三十里），龙潭乡（百二十里），南胜乡（百二十里，设有盐馆。元初建南胜县治于此），层山村（百三十里），后裕乡（百四十里）。

#### 五寨约（县东）新安里四图

高寨乡（百十五里），均寨乡（百一十里），乌门乡（百三十里），五寨社（百二十里），厚巷乡（百二十里），前版乡（百三十里），新桁乡（百二十五里），圃平乡（百二十八里），广坑乡（百二十里），侯阮乡（百三十里），藻亭乡（百三十里），松子鞍（百三十里），三觉（一作“三角”）径（百二十五里，设有盐馆）。

#### 三平约（县东）清宁里一图

透龙乡（百三十里），覆地浒（百三十里），龟渡乡（百三十里），虎榜乡（百三十里），三平社（百三十里），上槐乡（百四十里），暇平乡（百四十里），瓯寮乡（百三十里），桐古社（百三十八里），游泳（一作牛运）乡（百三十八里），柴头埔（百三十里），顶张乡（百四十里），霞章社（百四十里），象坑乡（百三十五里），三传乡（百四十里）。

#### 黄井约（县东）清宁里三图

径内乡（百三十五里），上峰乡（百四十里），黄井乡（百四十里），均仓乡（百三十八里），浹理乡（百四十里），夏敦乡（百三十五里），加老径（百四十五里），龙须乡（百四十五里），西廛乡（百四十五里），宗山乡（百四十里）。

#### 翠徽约（县东）清宁里三图

文峰乡 一名翠徽社（百四十里，设有盐馆），蹊山乡

（百三十里），大埕乡（百三十里），洋尾乡（百三十里），挨砮石（百三十里），洪楼乡（百三十五里），涛桥乡（百三十里），新坵乡（百三十里），姜洞乡（百三十里），东溥乡（百三十五里），展后乡（百三十七里），黄堵乡（百四十里），坡紫寨（百三十五里），菲菜阮（百四十里），洪坑乡（百三十里），赐平乡（百三十里）。

#### 山格约（县东）清宁里四图

偶措（一作“口厝”）乡（百十里），宝峰社（百一十里），乌石乡（百十五里），宫宰前（百二十里），大露顶（百二十里），隆庆社（百十五里），石规乡（百十五里），火焰径（百二十里），宝珠径（百三十里），厚阮社（百十五里），马溪乡（百一十里），铜头乡（百十五里），夏潢乡（百十五里），上洪濂（百二十里），高磔社（百十五里），北山乡（百一里），涂田乡（百一十里），新墟乡（百一里），山城坑（百一里），内涂田（百一十里），黄涂岭（百一十里），夏埔乡（百一十里），敦上社（百一里），露边乡（百一五里），山格乡（百一里，设有盐馆），旧县社（百一五里。元至元中，移南胜县治于此）。

#### 瑄溪约（县东）清宁里二图

瑄溪社（百一里，设有盐馆。墟市贸易胜于县城，粤客往来捷径），中山乡（百一里），小溪社 一名遵畴寨（百一五里。所制烟丝名半天下），宝善乡（百一五里），古楼乡（百一五里），钩平乡（百一里），许讲乡（百一里），库丘乡（九十里），帽仔山（九十里），沟口乡（九十里），豆笪乡（九十里），径口乡（八十五里），溪头社（百一十里），西山社（百一五里），产阮社（百一十里），卓教乡（百一十里），内洋乡（百一十里），柏塘乡（九十里），墩上乡（九十五里），塘内乡（九十五里），许者院（九十五里），溪浒乡（百一里），坑里乡（百一五里），厚畚乡（百一五里），厚平乡（九十一里），厚塌社（百一里），厚坂社

(一百十里), 圆窠乡 (一百十里), 安兜乡 (一百十里), 金山仔 (百十五里), 山兜乡 (百十五里), 岩坂乡 (百十五里), 宝镜乡 (百十五里), 黄寮乡 (九十里), 老寨乡 (九十里), 村美乡 (九十里), 双潭乡 (九十里), 猴岩乡 (八十里), 顶厦乡 (九十里), 新安社 (九十里), 东干 (一作“东崁”) 社 一名长芦口 (九十里), 三司庙 (九十五里), 三台石 (九十五里), 长汀乡 (八十里), 新桥乡 (八十里), 丰埔乡 (八十里), 仙草亭 (七十五里), 小平社 (七十里)。

#### 大坪约 (县东北) 清宁里五图

黄庄社 (五十里), 羊坑 (五十三里), 山编社 (五十九里), 普美 (俗作“埔尾”) 乡 (六十里), 溪平乡 (六十里), 霞寨社 (六十里), 寨内乡 (六十里), 站 (一作“店”) 后乡 (六十里), 涂楼乡 (六十里), 桥头乡 (六十里), 西奎社 (六十一里), 山仔后 (六十二里), 长福村 (六十二里), 彭林乡 (六十三里), 温措寨 (六十四里), 赤岭头 (六十五里), 普平 (俗作“埔坪”) 墟 (六十五里, 设有盐馆), 安全 (一作“庵前”) 村 (六十九里), 厚塘乡 (七十里), 长汀乡 (七十一里), 水美楼 (七十三里), 枣树脚 (七十二里), 瑞暇 (一作“树下”) 乡 (七十一里), 白银乡 (七十里), 东山乡 (六十八里), 大库乡 (六十七里), 枫树湖 (六十六里), 岩岭乡 (六十里), 普宰 (一作“埔仔”) 乡 (六十里), 大坪社 (六十五里), 希觉 (一作“溪角”) 乡 (六十五里), 下墟 (六十五里), 新成乡 (六十五里), 梧充乡 (六十五里), 大措乡 (六十五里), 箕干乡 (六十五里), 山璇乡 (六十五里), 夏梧乡 (六十六里), 岭下乡 (六十六里), 东古村 (六十八里), 新措乡 (六十五里), 顶墟 (六十五里), 黄库乡 (六十五里), 西爽乡 (六十五里), 西皋 (六十五里), 溪心乡 (六十二里), 坦昭乡 (六十五里), 后窟乡 (六十五里), 新寨乡 (六十五里), 旧寨乡 (六十五里), 睦顺乡 (六十五里),

东场乡 (六十里), 抚笼乡 (八十里), 双坑仔 (八十里)。

#### 芦溪约 (县北) 清宁里七图

竹坝乡 (一百里), 丰洲乡 (一百里), 枋头坂 (一百里), 蕉坑 (八十里), 新村 (九十五里), 桑坑 (九十里), 桐皮乡 (一百里), 官寮 (九十里), 水井乡 (一百里), 铁骨头 (一百十里), 柯岭头 (一百一十五里), 大岭脚 (百四十里), 葛竹乡 (一百一十里, 设有盐馆), 根竹隘 (一百二十里), 定碑墩 (七十里), 盈宰乡 (六十里), 冬槐乡 (九十里), 熊坑 (九十里), 丰树版 (一百里), 西溪乡 (一百三十里), 芦溪社 (九十里, 设有盐馆), 厚陇 (一百里), 曹充隘 (一百三十五里), 田寮乡 (九十五里), 小连城 (百二十里), 露下乡 (百一十里), 浒坑 (九十里), 梨坑 (七十里)。

#### 平垵 (原称“平和”, 后避县名, 俗改今名) 约 (县西北) 清宁里五图

大科里 (四十里), 治久村 (四十五里), 大窠头 (五十里), 留觉陇 (五十里), 安和里 (五十里), 田心村 (四十里), 坎下乡 (五十五里), 大坝头 (六十里, 设有盐馆), 龙岭背 (五十五里), 平垵社 (原名平和, 四十里), 呈阮 (四十里), 圳下乡 (五十里), 下坑 (六十里), 杨梅崁 (六十五里), 象湖村 (六十五里), 九曲塘 (六十里), 流恩村 (七十里), 山冈社 (九十里), 莲花石 (七十里), 小象湖 (七十里), 篁竹里 (八十里), 朱公畲 (一百一十里), 香平墟 (八十里), 三莱洲 (八十里), 里佳畲 (一百里), 小芦溪 (一百里), 上下樟溪 (五十里), 汶水乡 (六十里), 黄坑 (九十里), 楮树坪 (九十里), 员仔溪 (九十五里), 漳汀乡 (一百里), 郑坡墩 (八十里), 霞村 (九十里), 横阮 (八十里), 下坪 (八十五里), □畲 (一百一十里), 赤珠隘 (一百一十里)。



**大溪约(县南)新安里五图**

庄上乡(五十里),店前乡(五十里),卓干社(五十里),江寨(五十里),范措寨(五十里),榕树寨(五十里),大溪社(五十里,设有盐馆),田背乡(五十里),慕宰前(五十三里),霞村(四十五里),水哮乡(五十里),水眼洋(五十里),上陂(六十里),石坑里(五十三里),乔梓头(六十里),大本里(五十五里),阮口(五十二里),霞径(六十里),虞古田(六十三里),车田项(五十五里),杨梅潭(五十五里),龙过冈(六十里),神仙祠(八十里),母子前(五十五里),石坡下(五十五里),曹祠(五十五里),豪林(五十二里),磨石溪(五十五里)。

**安厚(俗名“庵后”)约(县东南)新安里三图**

马堂社(八十里),竹根寨(八十五里),莲塘乡(九十里),鸡啼径(九十里),三角径(九十里),郑坑(八十里),平寨(九十五里),龙峰头(九十里),平塘乡(六十五里),暗敬乡(八十里),吴坑乡(八十里),石芹乡(一百里),佛髻岭(一百里),仙人洞(八十里),七姑山(九十五里),涂窟坵(一百一十里),汤部乡(八十五里),中平寨(一百里),乌梨乡(百二十里),大峇乡(一百二十里),河仔楼(九十五里),龙头乡(九十里),枳头寨(百二十里),石壁寮(一百一十五里),西山埔(百二十里),萍水乡(百一十里),枫林乡(一百里),马溪乡(百一十里),员田径(百一十里),白花洋(百一十里),关弓阮(百一十里),礲头乡(九十五里),钓马乡(九十八里),三斗阮(九十五里),巷口乡(九十里),岭门乡(一百里),坡头乡(八十里),山布社(六十里),白石乡(七十里),汤干乡(八十五里),大径(七十八里),下径(八十里),清山乡(七十五里),九宝阮(七十五里),东陶乡(九十里),贤对乡(九十里),崛梓乡(八十五里),山口乡(八十里),东坡乡(一百

里),崖下乡(九十里),旧洞乡(九十里),图楼乡(八十里),古楼寨(八十七里),安厚(俗名“庵后”)墟(八十里,设有盐馆),安厚城(八十二里),上下埔(九十里),古阮(八十四里),菜公凹(五十五里),河阳乡(七十五里),半地乡(一百二十里),呈奇岭(一百一十里,离云霄城五十里)(按以下割归云霄),何地保(一百一十里,离云霄城四十五里),马铺保(一百一十里,设有盐馆,离云霄城四十五里)。

**厚嗣(又称“十二牌”)约(县东南)新安里二图**

厚嗣乡(七十里),暇坡乡(七十五里),候山乡(八十五里),五斗埔(八十里),厦洞(八十里),仙人石(八十里),酒瓮山(八十五里),石梯岭(八十五里,离云霄城四十里)(按以下割归云霄),十二牌(九十里,离云霄城三十里),下河保(九十二里,离云霄城二十八里),孙坑乡(一百一十四里,离云霄城一十六里),上河保(一百里,离云霄城三十里),南岭门(一百五里,离云霄城一百五里)。

**云霄约(县东南)新安里一图**

下坂保(一百二十二里,离云霄城二里),朴树坑(一百三十五里,离云霄城四里),中寨保(一百二十五里,离云霄城五里),洋下保(一百三十五里,离云霄城十里),白塔保(一百三十六里,离云霄城十里),上路头(白塔保内小地名),象坑保(百三十二里,离云霄城十二里),棣子头(象坑保内小地名),船场保(一百三十里,离云霄城五里),下坛保(一百四十里,离云霄城二十里)。

**西林约(县东南)新安里二图**

西林社(一百一十里,离云霄城十里,设有盐馆),世坂保(一百二十里,离云霄城十里),和瑞堂(一百一十里,离云霄城八里),溪口社(一百一十五里,离云霄城十里),东车社(一百一十五里,离云霄城十里),下埔社(一百二十八里,离云霄城

一十二里)。

#### 山全(一作“山前”)约(县东南)新安里二图

岳坑保(一百四十里,离云霄城二十里),山全保(一百三十里,离云霄城二十里),佳栋保(一百三十五里,离云霄城二十里),高埭保(一百三十五里,离云霄城二十五里),下城保(一百三十里,离云霄城十里),后园保(一百三十五里,离云霄城一十五里),真珠坂(一百四十里,离云霄城二十里)。

论曰:平和分南靖七里之二以立县,而以今二里度其广袤,与南靖县五里之地势若相掎者,盖崇峻多而平衍肥旷之土少,前明之世,固视此为险远也。旧志于二里十二图之内,分为六十一社,地名既十不有其二三,而东西南朔道里之远近,质诸土人且急无以对,况守土与于役者之至自外来,其能亟得所向往耶?

夫比、间、酈、鄙,职方掌之,《周官》详之;故虽天下之大,可以心腹臂指使也。邑之有坊里乡社,犹身之有肢节;道里则其肠胃筋脉之短长广狭也,调剂攻补,医之所贵于经络明而荣卫别也。今就二里中所分二十四约,征其联属之村庄道里,访之绅耆,询之老胥,分稽合校,列之于篇,积经半载而大略乃备。盖其慎也,夫亦以知众人之所忽,正作志以备用者之郑重周详,固大有深意寓焉。

孟子以仁政必自经界始起,惟方隅备、道里详,而一邑之中边、形胜之险夷,乃瞭然心目,裁成补救,乃得因时因地以起。今县治僻界西偏,视东南势如臃肿,呼吸有所难通,或且疑王文成地未亲历,建置弗周,不知地利之讲求,正为兵家所先事也。其时流恩、象湖毗连广东饶平之大伞、箭灌,寇平筹远,要害莫重于西。建县之议,虽以南靖之所不及,实阴以扼制大伞、箭灌诸巢之险。古大臣用心公,普视两省如一,以其时其地度之,则平和固自居中以相驭也。迨嘉靖五年,分饶平置大埔县,诸巢

既有所专莅矣。于是平和西界之地轻,而东南诸乡岐立于漳浦、诏安,犬牙之交,偏重之势渐形。故自嘉靖至万历,移海防同知、捕盗通判先后并驻于云霄镇。

云霄镇固闽粤水陆交汇之区,而平和西林、山全诸约距云霄则近自里许,而遥至县城且百数十里远矣。

国朝乾隆九年,尝议割平和之石梯岭、漳浦之盘陀岭、诏安之尤甘岭三岭以外归云霄,设为新县。已得其要矣,乃因仍至十二年仅移本郡海防同知于南胜,移漳浦县丞于云霄。虽有分理庶务之名,而总纲提要仍责归于县,官多掣肘,民且歧视异趋。自乾隆二十五年至六十年,以设县分地请者屡矣。夫以东极一百四十里至官津桥,又南至朴树、下坛诸保,皆孤悬漳浦、诏安。腹背肘腋之内,身之于四体,一有偏重则血气阻,非赘疣即臃肿也,所恃俞、扁之视及五脏,早为剔抉攻补耳。

今就輿图以稽前议,以石梯岭为界,而马铺、何地诸保犹弃置于肘腋之外;惟界以呈奇岭,则凡岭之东南,如安厚约所属之呈奇、何地、马铺,厚嗣约内之石梯岭、十二牌、下河、上河诸村保分以归之,如云霄约、西林约、山全约统以归之,此平和天然之疆界。而云霄居三岭之中,亦天然心腹、股肱、脉络自为灌输,夫岂复有患于臃肿哉?然非常之业必待其人而兴,洎嘉庆四年,奉旨奏准平和县辖石梯岭下高地等二十保拨归云霄同知,并征钱粮、管理命案,惟不另设学校,考试仍归平和,法至善也。以平和自始有甲子即有此土,而待之四千余年而乃有县;县立三百余年而村庄道里始得备著于篇,地之显晦移易,盖亦有运会存焉。故纪次诸约。至于呈奇岭以外经割隶者,悉详注其距县、距云霄远近,俾后有所考证。凡古人所为分疆而理、设险以守、图治于安且久者,略于是寓焉。

## 山川志

崇峻奥区，因时建县。四水分源，万山互□。山川何名，名以人见。辟其草莱，礼乐为□。险非象湖，瑞云张晏。肋之弦歌，九和名銜。毓秀钟灵，源析匹练。河声流西，抱惭未遍。志山川第三

**大双髻山**（俗名“双髻娘山”）在县东北大坪约之大坪社，离县六十五里，两峰并峙，连亘数十里。山源自汀州而来，逶迤以趋县治，为一邑之祖山。

**双髻山** 在县北郊三里许。其脉自大双髻山，盘结并峙，由西横亘而北为小坡，垂注于县治之后，为邑少祖山。邑中登科第者多二人联翩并起，堪舆家以为此山之应，理或然也。坡之麓建九和书院，祀王文成于中，以志师承，示不忘建邑之功也。今移东郊，专祠祀之。乾隆己卯，知县胡邦翰植松木万本，望之葱郁，尤足为山灵之助。

**九和山**（又名“九岭”）在县东郊里许。九峰联贯如屏，列于溪侧，县署望之崒嶭有致，拱护最亲。故为邑中诸山之望，且以为平和别号云。

**东山** 在县东郊，与九和山并峙。高峰耸立，宛若文笔。

**双塔山** 在县南郊四里许。朝拱于文庙之前，山势低凹。明隆庆二年，知县卢焕鸠工列栅垒土填筑，层累而上，期年始成。高十五仞，周千二百尺。万历二十四年，教谕黎宪臣复筑双塔于其上，俨若文峰。

**天马山** 在县南郊五里许。横峦平亘，首尾低昂，若天马腾骧于云际。

**五凤山** 在县东关约之田心社。离城十里，俗呼“颺半天”。五峰叠起，高耸天半，夕阳西映，嶽巒辉煌，倍形精采。后有石

人峰，怪石挺立如人，故名。

**聚奎山** 在县东关约之崎岭社，离城三十里。山有小阜，错列如星之聚奎，因以为名。

**鸡翅山** 在县东七十里之高坑约。土人目为鸡展翅。

**狮铃山** 在县东高坑约之霄岭社，离城七十里。巉岩雄险，势如狮猊飞跃，中垂小坡如金铃。海澄公黄梧祖葬于此。

**雷平山** 在县东高坑约，离城八十里。

**深寮山** 在县东坂仔约之客寮乡，离城八十里。

**虎项山** 在县东坂仔约之虎耳村，离城九十里。下有小庵。

**横山** 在县东坂仔约，离城九十里。

**石阙山** 在县东坂仔约之西坑乡，离城九十里。石峰屏列，或断或续，参差有致。

**壶卢山** 在县东坂仔约之客寮乡，离城八十里。土人以形命名。

**狮鼻山**（又名“横山”）在县东溪洲约之横山乡，离城一百里。顶有岩窠如鼻，可容十数人。前临溪岸，中有僧寺，足资眺望。


**西碛山** 在县东洋头约双溪墟之西，离城九十里。山峰高出云表，其巅可以望海。

**南寮山** 在县东双溪墟之北，离城一百里。下有村庄，间于畝亩。

**阙山** 在县东双溪墟之北，离城一百五里。中建有佛寺。

**九牙山** 在县东南胜约之南胜社。离城一百二十里，为漳浦县治发源之山。众峰列峙尖耸，状如牙笏，故名。又曰矾山，以其石堪煎为白矾。明时设矾户二十，今税额犹存。元至治中，置南胜县治于其东山阴。今建有书院。详见《古迹》。

**石屏山** 在县东南胜社，离城一百三十五里。相传山石多仙迹。



耸，横展右垂，其麓有庙，庙左古榕青郁，往来者憩焉。登峰而望，则琯溪城市人烟环集，樯帆上下，亦大足以占升平民物之繁，而助游观之兴。

**大湖山** 在县东琯溪约之塘内乡，离城九十五里。高峰巍峨，山半巨石卓立，土人呼为望耆石。以大耆山在其左，可望而见也。下为长芦山，其麓为隆兴寺，寺前榕树森翠，右有泉，清冽而甘。

**韩山** 在县东大坪约之霞寨社，离城五十六里。盘曲于众峰之间，园净肃穆，下临硤冲石，水声澎湃，<sup>①</sup>而巍立自得。相传有韩氏子仙隐于此，人莫能窥其迹云。

**白银山** 在县东大坪约之白银乡，离城七十里。洁白而光辉，若银之出冶，故名。

**鹅毛山** 在县北关约，离城十里。

**方壶山** 在县北芦溪约之芦溪社，离城九十里。

**金溪山** 旧志在县北之芦溪社。

**赤须山** 旧志在县北之芦溪社。疑即离城一百一十里之赤珠隘也。

**玉槛山** 在县北芦溪约之葛竹乡，离城一百一十里。高出群峰之表，迤邐而前为笔架山，峯峯耸秀，泉飞瀑布，盘旋众壑，为南靖县河港、山城诸溪之源。

**象湖山** 在县西北坪垵约之象湖村，离城七十里。相传古有二象伏息其地，岩崖崇峻，绵密盘旋，号为险峭之区。明时广东大伞、箭灌诸寇出没盘踞，倚为巢窟，兵力莫加。正德十二年，巡抚王守仁遣军进破，寇盗遂平。今其下民居稠密，樵歌牧唱，日与烟云互接，故老已忘其为昔日用武之地矣（详见《古迹》）。

**璜梗山** 在县西北坪垵约之璜阮，离城八十里。冈峦长亘，

<sup>①</sup> 澎湃，波浪冲击貌。澎湃，水声。此处似应用“澎湃”为妥。

通泉绕谷，可以布种山稻，与广东大埔县界连接。明季顽民遁逃之藪也。

**楼客山、岑山** 旧志俱云在县西。

**诸佳山** 在县南关约，离城三十里。与诏安、饶平交界，峻岭深林。顺治庚子，山寇李晚尝聚于此。今为往来要道，前有掌上山。

**芹溪山** 在县南关约之芹阮，离城十里。

**鹅髻山** 俗呼为鹅公髻。在县南关约之陈坑，离城十五里。层叠崇冈，堪舆家指为漳浦、海澄、诏安、饶平四邑山脉发源之祖云。

**大芹山** 在县南关约之白水磔，离城三十里。秀峰圆耸，旁有一峰曰小芹山，相传其麓尝生野芹。

**大琼山** 在县南大溪约之水眼洋，离城五十五里。脉自鹅髻山而来，绵亘数十里，连为小琼山。东接大棒山，崇高土壤，不以岩洞竞奇。

**大棒（俗讹作峰）山（旧称大枋山）** 在县东南安厚约之马塘社，离城八十里。高峻巉岩，自山麓至巅，约六十里有奇；登陟而望，则远近城邑小如盘盂。海中番舶望见此山，则喜近闽境矣。故陈璘诗有“回帆天外覩唐表，旧燕春前认汉标”之句。中多岩洞，有旭日、天中、枫山、狮子、青云、修行诸岩。最奇者曰灵通岩。此岩盘石为盖，清泉自岩巅喷涌而下，如霰如珠，四时不涸，陡壁绝险，不知几千丈。游览者由修行亭援石梯而上，至者常少。又有二洞，每风出，其色如绿雾舒卷者曰风洞，未雨而岚气浓结如霏者曰雨洞。其余如猿洞、蝴蝶洞之类，不可胜纪。天中岩峭壁上，刻有“擎天”二字，大丈许，邑人张理吾书；又有“天子万寿”四大字，旁注“龙飞崇正（禎）庚辰季冬之吉，臣张士良稽首拜祝”小字两行。明时相国龙溪林釭、漳浦黄道周与邑诸生朱龙翔，皆读书于此，并有题咏诗文传世（并见

《潜确类书》，详见《古迹》。

**龙牙山** 在县东南安厚约之大峇乡，离城一百二十里。

**浮山** 在县东南安厚约之吴阮乡，离城八十里。

**七姑山** 在县东南安厚约，离城九十五里。上有棋局，相传昔有仙女尝与樵子对奕于此，石上尚存遗迹（并见《古迹》）。

**白石山** 在县东南安厚约之山布社，离城六十里。列石嵯峨，与大棒山南北遥相拱峙。山后有长林寺、高隐寺。东行数里为点灯山。

**香炉山** 在县东南安厚约。与安厚城相近，离城八十五里。以形象而名。

**南斜峰** 在县东关约十里，九和山之阴。

**石人峰** 在县东关约之浮坪社，离城二十里。石奇耸如人立，前为五凤山。

**石犀峰** 在县东关约之崎岭社，离城三十里。中有天湖堂。

**凤髻峰** 在县东坂仔约之铜壶社，离城一百里。以形似凤髻，翘翠苍秀而名。

**龟蛇峰** 在县东三平约之三平山。离城一百三十里，峰峦耸异。

**狮子峰** 在县东南安厚约大棒山之东。离城八十五里，为山中十七峰之一。旧传唐陈元光改葬其父于狮口。今峰半有岩可容百人，一名吼岩。岩下溪桥，邑人张士良刻有“自度度人”四字。旁有巨石，耸插干霄，前贤题为“第一山”，字大数丈（详见《古迹》）。

## 崖 石

（有崖则有石，择其卓然而异者特表之。）

**迎宾石** 在佛祖岩。山门屹立如童子迎客者然。

**洪武石** 在邑东溪水中。和人端午节群浴于此。

**尖石** 在高坑社。

**三台石** 离瑄溪十里。大石三片立于道旁，邑人勒“三台石”三大字于其上（并见《古迹》）。

**硿冲石** 在下寨社。有三硿，其石大数亩，中有纹如犁田痕，亦有牛迹。相传以为仙人所耕石田也。岸上尝有石炉、石盘出现，樵者多见之，再往寻觅，竟不能得。其水冲石而下，如瀑布然（详见《古迹》）。

**宝珠石** 在宝珠径。相传石窍中有宝珠（详见《古迹》）。

**米窟石** 在山布社。石缝内能出米，故名（详见《古迹》）。

## 洞

（洞山之穴而幽者曰洞，故附于山。）

**蛇洞** 中有蟒蛇，其大如轮。在大棒山。

**蝴蝶洞** 亦大棒山胜景也，灵异不测。

**陈先洞** 与葛布岭相对。昔日陈先作乱，聚众于此，其妹以为不义，去之前山，躬自治葛为布以食。故洞名陈先，岭称葛布。

**伽蓝洞** 在县东十里马蹄山之麓。相传以为昔日妖玉作乱居此洞。古称南蛮十八洞，此其一也（详见《古迹》）。

**乌泥洞** 在坂仔。岩险异常，相传畚寇李志甫据此作乱，四帅征之，兵不能进。陈君用侦知洞后有间道，乃募壮士数十人潜

docsriver 文川网  
入驻商家 古籍书城

在文川网搜索古籍书城 获取更多电子书

人，猝遇志甫，地狭，兵器不得用，因手格杀之，余党悉平。

禅师洞 在县东一百一十里（详见《古迹》）。

## 岭 径

（山高可度则为岭，峰回路转则有径。岭路之高而崎者，径路之曲而纡者，亦以附见。）

崎岭 在县东北三十里，上达府城。

大峡岭 在县东北五十里。有石晶泉，甚甘冽，旁建观音宫。又三里有寿德亭，里人周继玺筑。

宝珠岭 在瑄溪。

小坪岭 在清宁里，离黄庄二十里。东下岭半有亭，亭曰“仙草亭”。

葛布岭 在县西南。左通大芹山，右通虎耳山，最为岩险。

石梯岭 磴石层叠而上，故名。

新路岭 在县西十五里。下通云霄。

蔡宅岭 去新路岭五里。

冷水坑岭 上下十五里。岭西为葛布，中建有关。

佛几岭 在吴坑。去县九十里，有奇，形如几案，故名。作“佛髻”者误。

鬼子岭 极高峻，由庵后达河埭孔道。

大岭 在坂仔社。岭有三崎，亦名三节崎，比石梯岭更为险峻。

割喉岭 岭上有村，曰白叶，宋末陈概弃官隐居于此。概，景肃孙也，为人方正。相传有为恶者欲过此岭，耻为概所短，自刎而死，岭因名焉。

龙须岭 在坂仔。

猪母额岭 在县东霞寨乡六十里。峰峦险恶，树木丛杂，达南胜孔道。

百松岭 离县二十里。岭上有关，达于饶平。

栗子岭 在县南。下往大溪，为大芹山之腰。

啼鸡岭 在县东十五里。

翠薇岭 在北郊。平而不高。

合路岭 县北五里。

秀峰亭岭 去县三十里。岭上有亭，里人游青选建。

员仔坑岭 在县北八十里。往漳汀司大道，岭上有亭。

柯岭（亦名“大岭”） 在县西北葛竹村。高数百丈，过此地势极峻，气候亦异，冬月常陨雪。

霄岭 在高坑，去县七十里。海澄公黄梧祖居于此。

松仔鞍岭 在五寨。设有塘汛（详见《兵防》）。

陈旗岭 在马铺。

三角径 在浦、和、靖三县之界。往时奸匪出没于此，近会设汛兵，轮季巡哨，地方以宁（详见《兵防》）。

虎头径

客寮径 在坂仔。

半地径 在坂仔、河埭之间。

宝珠径 其地有石出宝珠（详见《古迹》）。

官寮径 在大坪。为芦溪孔道。

半径二 一在石晶水，一在庵后。

暗径 在庵后。

蔡宅径 在蔡宅岭。为县西路。

径仔 在县东二十五里，崎岭之西。

火焰径 〈在〉翠薇社。

宝树径 亦在翠薇社。过此为南靖地。



## 溪

(和去海颇远，山谷之间，溪流最多。)

河头溪 源发高山、官寮。自东而南，绕县西去，由赤石岩以达三河。

粗溪 在县东七里。为河头上流。

合溪 二水合流，一自官寮山而来，一自高山而来，交合于此。故以名溪，亦曰“双溪”，下趋邑治。溪南有佛寺，曰“觉道岩”。

高山溪 水流二脉，西流者自合溪、粗溪以达河头；东流者自大坪东场至下寨合流，以达溪口。

陈溪 源发大琼山，流入双溪，与河头水合西流。

双溪 一水自大峰而来，一水自陈溪而来，合流至黄田与河头水会。

芦溪 源发双髻娘、铜皮、三团，自漳汀流入坪垵。南行至赤石岩下，与河头水会出三河。

南胜溪 源出矾山，东流达于溪口。

高坑溪 双髻娘山发源，由大坪、岩岭、下寨至坂仔，会南胜之水以趋府城。

瑄溪 水自高山流来，出于双溪。

高磔溪 流至山格，与瑄水合。

马溪 在瑄溪下流，相去十里。

溪口 二水合流。左自大口坪，右自南胜，合于西山，流出府城以入海。

翠薇溪 出翠薇溪，南行与瑄溪合。

大溪 源发大琼，流出诏安。

三合溪 出樟山者二，出白石山者一，在山布社合流。出白

石溪，会佛几岭诸水，经上河以达西林。

渡军溪 在县西二十里。

## 池 潭

(孔安国曰：“停水为池，池，沼也，潭水深处。”

杨子云解嘲云：“或横江潭而渔。”)

泮池 在学宫。制不甚大，澄清如鉴，每逢水溢，则科甲之兆。旧志谓：“人文有象，波澜出色”，为县八景之终。

放生池 县东郊。昔年杀贼于此，池水尽赤，后屡为祟，因立放生碑于池畔，其祟遂止。

印月池 在樟山佛祖岩。

天池 在大樟山紫石岩上。其水四时不竭。

釜底潭 在放生池下。

洪武石潭 在放生池上。

九尾潭 在县西郊。

龙船潭 县东水门外。邑人端午节皆竞渡于此。

七车潭 去县十五里。

陂仔潭 在田心社。

龙潭 县西。

东峨潭 在县东郊。

福潭 在田心。

大陂潭 离福潭不远。

石鼓潭 县南郊。秋水澄清，夜月耀彩，绝非人间凡境。为县八景之六。

石浚潭 在高坑上流。

茶亭潭 在下坪社。深不可测。